

Kebiasaan baharu: Kaji dasar ekonomi menepati kehendak rakyat

Astro Awani

08 Ogos 2020

Fauzi Suhaimi,

KUALA LUMPUR: Kerajaan disarankan untuk mengkaji semula pelaksanaan dasar berkaitan ekonomi agar usaha itu benar-benar menepati kehendak rakyat dalam mendepani cabaran COVID-19.

Pengerusi Eksekutif Institut Agro Usahawan (iGrow), Nordin Abdul Malek berkata, perkara itu perlu diselaraskan dengan pelaksanaan atau penyesuaian kebiasaan baharu dalam kehidupan masyarakat demi merancakkan sektor ekonomi di negara ini.

"Tidak dinafikan kebanyakan usahawan terjejas sejak pelaksanaan Perintah Kawalan Pergerakan (PKP) dan bukan semua perindustrian kecil dan sederhana (PKS) memerlukan insentif daripada kerajaan seperti pinjaman.

"Sebaliknya, apa yang mereka mahu adalah akses peluang pekerjaan yang lebih baik. Ini bermakna satu dasar yang menjurus kepada kempen terus berbelanja perlu diperkasakan dengan menggunakan kebiasaan baharu seperti dalam pembelian dalam talian.

"Ini kerana, sekiranya kerajaan tidak merancakkan tabiat berbelanja dalam kalangan rakyat seolah-olah tiada manfaat bantuan yang diberikan (kepada PKS) dalam bentuk pinjaman itu dan kapasiti perniagaan tidak akan bergerak," katanya ketika ditemubual menerusi Buletin AWANI Khas di sini pada Sabtu.

Dalam pada itu, Nordin berkata, semua industri pula diminta untuk melakukan pembaharuan khususnya dengan mengamalkan pembudayaan baharu dalam perniagaan.

"Antara pembaharuan lain termasuk pembudayaan dengan pekerja serta pelanggan dan kaedah perniagaan selain inisiatif kerajaan juga memerlukan budaya baharu.

"Tidak dinafikan inisiatif yang disediakan kerajaan memang baik tetapi dalam masa sama kita lihat kaedah itu seperti kaedah tradisional, sedangkan banyak lagi ruang lain yang perlu dipertingkatkan khususnya dalam aspek pembudayaan kebiasaan baharu dalam masyarakat untuk terus berbelanja," katanya.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/kebiasaan-baharu-kaji-dasar-ekonomi-menepati-kehendak-rakyat-254387>